

**Kræftimik nappaateqarnerup paasineqarnerata kingorna ullut 28-t qaangiutsinnagit kræfteqartut katsorsarneqarnissamut tamarmik pilersaarusiunneqartarnissaat qanoq qulakkeerneqarsinnaanersoq kingusinnerpaamik ulloq 1. november 2019-mi qulaajaqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Tamatumani nunatsinni kræfteqarlutik toqusartut ikilisinneqarnissaannik anguniagaqarnerup anguneqarnissaa siunertarineqarluni.**

(Inatsisartunut ilaasortat, Stine Egede aamma Sofia Geisler, Inuit Ataqatigiit)

**Nappaassuarmik Kræftimik eqqugaasimalluni paasineqarnermiit sivisunerpaamik ullut 30-vit qaangiutsinnagit katsorsarneqarnerup aallartereersimasarnissaanik qularnaarussisoqartalernissaa qanoq iliorluni piviusunnngortinneqarsinnaanersoq pillugu misissueqqissaarinermik ukioq 2019 naatsinnagu Naalakkersuisut saqqummiusseqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Jess Svane, Siumut)

#### **Akissuteqaat**

(Peqqissutsimut, Isumaginninnermut Inatsisinullu Atuutsitsinermut Naalakkersuisoq)

#### **Siullermeerneqarnera**

Kræftimik nappaateqarnerup paasineqarnerata kingorna ullut 28-t qaangiutsinnagit kræfteqartut tamarmik katsorsarneqarnissamut pilersaarusiunneqartarnissaat qulakkeerniarlugu, Inuit Ataqatigiit sinnerlugit ilaasortat Stine Egede aamma Sofia Geisler aalajangiiffigisassatut siunnersuummik nassiussaqaarsimaneranut Naalakkersuisut qujapput.

Aammattaaq Siumut sinnerlugit Inatsisartunut ilaasortap Jess Svanep nappaatip suussusersineqarneraniit sivisunerpaamik ullut 30-vit qaangiutsinnagit kræftertut katsorsarneqarnissaannut qularnaarussisoqartalernissaa qanoq piviusunnngortinneqarsinnaanersoq pillugu misissueqqissaarinermik ukioq 2019 naatinnagu Naalakkersuisut saqqummiusseqqullugit peqquneqarnissaannik aalajangiiffigisassaattut siunnersuuteqarnera pillugu Naalakkersuisut qutsavigaat.

Ukiuni kingullerni annertuumik nunatsinni inuiaqatigiit tungaanniit kræfti ukkatarineqarpoq, Naalakkersuisullu susassaqaarfimmi ineriartorneq qanimut malinnaavigaat. Taamaattumik misissuinerup inerneru, aalajangiiffigisassatut siunnersuummi innersuunneqartut, aamma annertuumik maluginiarneqarput. Susassaqaarfiup aamma misissuinerup inernerisa

annertuumik ukkatarineqarnerisa takutippaat, Kræfti pillugu pilersaarummi, ulloq 1. januar 2014 atuutilersumi sulilu ullumikkut atuuttumi suliniutit qanoq pingaaruteqartigisigut.

Misissuinermi aalajangiiffigisassatut siunnersuummut tunngavigitinneqartumi ilisimatuuniit eqqaaneqarpoq Kalaallit Nunaanni kræfteqartut misissorneqartarnerisa, katsorsarneqartarnerisa malittarineqartarnerisalu ingerlarngisa misissorneqarnerusariaqartut. Tassunga atatillugu oqaatigineqarsinnaavoq ullumikkut taakkua immikkut ittumik ukkatarineqareemata, Kræftilu pillugu pilersaarummi suliniutit taakku pingasut ilaareerput. Pissutsilli pitsanngortuarsinnaapput, Peqqinnissaqarfillu ineriartortuarpoq.

Ukiuni kingullerni Dronning Ingridip Napparsimmaviassuani nutaamik peruluttut inaannik, pilattaavimmik, qinnguartaavimmik kiisalu misissuisarfimmik pilersitsisoqarsimavoq. Tassa atortut nutaat assigiinngitsorpasuarunik periarfissallit atorneqalerput, kræftillu suussusersinissaanut katsorsarnissaanullu periarfissat pitsaanerulerlutik.

Innuttaasut nunatsinni katsorsarneqarnissamik neqeroorfigineqarsinnaanngitsut Danmarkimi katsorsartinnissamut innersuunneqartarput. Napparsimmavinni katsorsaaviusussani inissaqartinneqartut apeqqutaallutik aggersaasoqartarpoq. Peqqinnissaqarfiup Region Hovedstaden suleqatigaa, taamaasilluni napparsimasut nakorsamit nalilersorneqarnerup kingorna napparsimmaveqarfimmut suliaritiffissamut innersuunneqartarput. Tamatuma saniatigut Rigshospitalemut attaveqarnissaq periarfissaasarpoq, tassani assersuutigalugu assilisat immikkut ilisimasalimmut nassiunneqartarlutik.

Peqqinnissaqarfiup anguniartarpaa kræfteqartutut paasineqartut tamarmik katsorsarneqarnissamut pilersaarusiunneqarnissaat ullullu 30-t iluanni, nunatsinni imaluunniit Danmarkimi, katsorsarneqarnissaat. Nakorsaq nappaatip suussusianik paasisaqartoq tamanna akisussaaffigaa. Nakorsap aamma akisussaaffigaa napparsimasunik ataqatigiissarisup sukkanerpaamik katsorneqarnissamut pilersaarusiornissaanik qulakkiinissaq. Iviangikkulli kræfteqarnermut tunngatillugu sapaatit-akunneri arfinillit ingerlasinnaasarput, tamatumani Danmarkimit immikkut paasisimasalimmit tikeraarneqarnissap pisariaqarnera pissutaalluni, taannalu sapaatit-akunneri arfinilikkaarlugit Dronning Ingridip Napparsimavisuanukartarpoq.

Kræfti pillugu pilersaarummi suliniutit nalilersornissaat ilaareerpoq. Nalilersuineq 2019-imi ingerlanneqarlunilu naammassineqassaaq. Nalilersuinermi ilaatigut kræfti pillugu pilersaarummi suut allanngortinneqartariaqarnerat kiisalu napparsimasunik katsorsaaneq suli annerusumik pitsanngorsarneqarsinnaanersoq ersersinniarneqartussaassapput.

Taamaattumik Naalakkersuisut inassuteqarput Kræfti pillugu pilersaarummi suliniutissaareersut tamatumaniilu naliliinissaq ukkatarineqassasut.

Taamaattumik Naalakkersuisut isumaqanngillat nalilersuineq naammassineqartinnagu misissuinerit immikkut ittut allat aallartisarneqarnissaat nalequttuussasoq. Akerlianilli katsorsaanissamut pilersaarut aamma katsorsartinnissamut qularnaveeqqutinut apeqqutit pillugit misissuinermi aallartinneqareersumi nassuiarneqarsinnaallutik.

Naalackersuisut taamatut oqaaseqarlutik allannguutissatut siunnersuummik imaattumik inassuteqaateqarput:

*”Kræftimik nappaateqarnerup paasineqarnerata kingorna ullut 28-t qaangiutsinnagit kræfteqartut katsorsarneqarnissamut pilersaarusiunneqartarnissaanut aamma kræftimik eqqugaasimalluni paasineqarnermiit sivisunerpaamik ullut 30-vit qaangiutsinnagit katsorsarneqarnerup aallartereersimasarnissaanik qularnaarisogartalernissaanut misissueqqissaarinissamut apeqqutit qulaajarneqarnissaanut, Naalackersuisut kingusinnerpaamik UPA2020 peqquneqarnissaannik Inatsisartut aalajangiiffigisassaattut siunnersuut.*

Allannguutissatut siunnersuut UPA2019-mi oqaluuserisassanut imm. 125 aamma 198 atuuppoq.